

移
華
書
屋
詩
存

移華書局詩存

校華書局
詩存

楊繼元署

民國辛酉七
月印於滇垣

移華書屋詩存序

移華書屋詩存四卷都古近體二百餘篇家弟揆叔新舊篇什爲子弟門人所搜錄將付梓人者也揆叔於爲學主通經致用中西載籍罔不探涉思措之經世雅不欲爭工拙於文字間故偶有吟詠脫稿卽不復省視此存者皆散佚刪汰之餘固知揆叔意所弗屬也雖然揆叔之孝友忠信所歷常變悲愉而不失其性情之正者未始不可於存詩見之余自馳驅仕宦四十年以來一以家事累揆叔余無內顧憂而揆叔之憂勞蓋亟可念矣去年冬余自嶺南返昆明得揆叔文山書言久患咯血將引病謝去今春夏之交遂解組以來老年兄弟風雨對床得踐宿約懷舊慨新絮語窮日

夜亟亟爲歸田里計而已寶巖刹居之林壑雙湖草堂之煙水吾
與揆叔蓋無日不溫縈夢寐繼自今揆叔往來其間餐香飲綠澡
雪靈襟吾知晚歲之寄興屬辭當必有別闢一異境焉者余猶冀
幸一再序之也辛酉七月兄藩謨

題詞

酉陽易光吉晴齋

兄弟兼師友齊名重穎濱連牀當雨夜走筆和花晨家國關懷摯
雲山點綴新堦簾吾有恨一誦一沾巾

劍川楊繼元慕陶

湖山吟嘯兩經秋又向爐關策馬遊難得知心重聚首新詩幾卷
讀從頭

少陵格律謫仙才雄健新奇絕點埃讀罷細參言外旨儒林循吏
兩兼該

龍池當日共研經霖雨蒼生念不停績著邊荒俱小試惺惺空自

惜惺惺

著作推君擅世家向湖居易又移華功名事業浮雲耳惟有文章
壽靡涯

昆明李坤厚安

滇西樸學首推王樂山先生經術湛深詩亦彬彬或蓋樹骨訓典之
區者選言自爾宏富也顧嗣其音者甚罕光緒庚寅滇大府築龍
池精舍選士之秀者肄業其中坤與劍川趙君湘皋廁其列同治
詩余主毛氏株株焉守一先生之說湘皋則兼采三家說心竊異
之而未嘗不服其博也余治經之暇旁涉他藝湘皋篤志研經語
及詩文若不屑置意者心愈異之而未嘗不服其專也未幾俱糊

口四方不通音問者幾十年乙卯秋復相聚於昆明則見其子弟鈔存君詩稿盈卷讀之竟乃恍然十年蹤跡半生辛苦抒其志致其用湘臬之人之境之詩歷歷呈躍紙上者蓋不徒以經訓爲文字而實以經術飭吏治有如是也樂山其有嗣音矣

石屏袁嘉穀樹五

乙卯六月湘臬兄以詩稿見示余讀竟而矍然曰始余推君詩奇而葩直而健皆龍池角藝時作也今盡刪諸作獨壯遊之篇什存半而強君本孝友忠信之才吏治綽綽餘事爲詩詩乃更進穀別君久俯仰宇宙挑燈懷人泊淡相遭寸心如結今班荆話舊快讀君詩知君歷年所經涉所設施卽謂之治譜可也僅以詩推君淺

矣哉

移華書屋詩存最目

卷一 甲午至庚子 存詩六十首

卷二 辛丑至辛亥 存詩五十八首

卷三 壬子至丁巳 存詩八十三首

卷四 戊午至辛酉 存詩五十八首

凡古今體詩二百五十九首

移華書屋詩存卷一

劍川趙 荃揆叔

甲午至庚子

甲午冬赴蜀省伯兄過雪山

雄關高萬仞寒雪積千年一入魚鳧國踟躕馬不前

雪後西署園林登眺

涉園晨出署愛雪獨登臨春入寒梅早雲封古洞深宛如留夜月
久與照山林莫辨飛鴻跡寥空悵望心

和伯兄涉趣園梅花原韻

地氣潛回暖天心久未荒初春初雨雪一萼一元陽石瘦伴高格

山空藏古香園中足生趣花事從此忙

隨伯兄集涉趣園并示張應卿世講廣順甥及諸從子

涉園尋古洞童子亦爭先姻婣驅盟結壘篴雁序聯幾人親骨肉
數畝古風烟瘦透三生石潺湲一勺泉箇中宜用晦門外別開天
玉柱高標後璇津碧漾前北鄰居近聖南向館儲賢橋小虹蜺度
籬疏蛺蝶穿虛亭禽下榻老樹鶴知年咫尺攀躋異尋常景色妍
晴雲披絮帽新雨鑄苔錢造化奇無匹風花靜得權鏤冰朝選韻
佇月夜分箋蕩滌俄如此清虛返自然長公疑吏隱季子似逃禪
業正恢廊廟蹤難溷市廛得時當並進抗志矢雙鸞巢許甘汚耳
機雲樂比肩抑吾終野逸隨遇任飛潛世事原無定天懷可自全

琴心堅好道茗味悟飛仙曠奧遊兼適升沈念合蠲有時光怪發
何處熱膏煎君看陰巖下神龍出九淵

寄懷楊亮臣孝廉繼元

故山重別四千里短褐論交二十年浪跡初經巴子國計偕猶滯
孝廉船感時詩愛唐工部排難書摹魯仲連回首龍池煙雨幻式
微賡賦記君先

和伯兄臘月按事秀山途中作原韻

國家分職貴廉明按部持衡洞世情雪擁溪山入詩界春歸花縣
趁風行一麾出守資宏濟三事探源重厚生莫負老親期望意遠
傳邊徼頌謳聲

和伯兄乙未正月二日登玉柱峯原韻

我懶未經登玉柱如兄方不負名山官閒來醉屠蘇酒寺古高撐
承露盤下俯閭閻迫民社上捫星斗近天顏蒼茫獨立題詩去野
鶴飛回爲守關

春行酉陽道中

花燦荒園錦榆飄野店錢深山谿洞隱仄徑薜蘿牽樵牧猶弦誦
衡茅自粥饘清明逢掃墓鄉思感年年

龔灘

千尋峭壁鎖江流第一雄關扼上遊鑿石居民牢結屋輕裝客子
穩乘舟濃參世味寶釐局靜聽濤聲臥驛樓明日看山隨水下翠

微深處幾回頭

春遠以下四首皆用杜題次原韻

故國先春遠愁身並世輕江流送花絮山隱憶柴荆鎮有三韓寇
何時四海清宸威原赫濯捷盼亞夫營

百舌

相彼微禽耳春殘解惜春應憑一聲曉喚醒百年身忽忽歲時晚
茫茫物色新山城同聽此獨感倚樓人

地隅

雁陣寒天末蠶叢古地隅望雲長念國擗埴有迷途骨相誰豪傑
躋攀倚僕夫那無松菊念三徑恐荒蕪

遊子

世路水如此愁心火欲然
溷茵花有恨風浪櫂難前
日暮猿哀嘯春寒客熟眠
何曾老君洞來往挾飛仙

歸夢

巫山江上近我夢正寥寥
貧養違親舍狂吟訖聖朝
楓青關塞黑月白斗星遙
神讖歸何處如聞隱士招

招寄壽蔡弟萱

別路生芳草遊蹤付短篷
三巴音問遠六詔夢魂通
家計子冬日名心我夏蟲
高堂憂叔季萬里性恩同

外河